

Mid-Day Dogri News Bulletin, 05th January 2025

समे — 12:25

<><><><><><>

Nitib Gadkari

सड़क ट्रांसपोर्ट ते राश्ट्रीय जरनैली सड़क सरबन्धी केन्द्री मंत्री नितिन गडकरी होरें रामबन जिले दे बनिहाल कस्बे तोड़ी जाने आली 2.35 किलोमीटर लम्मी ते कन्नो कन्नी चऊं गडिडएं दे लंघने दी सुविधा आली बाईपास सड़क दा कम्म कामयाबी कन्नै तोड़ चढ़ने दी घोषणा कीती ऐ जेह्दे पर 2 अरब 24 करोड़ 44 लक्ख रपे दी लागत आई ऐ। राश्ट्रीय जरनैली सड़क एनएच-44 दे बनिहाल कोला रामबन तगर आले हिस्से पर बनाए गेदे इस बाईपास पर चार बड्डे पुल ते त्रै लौहकियां पुलियां बी बनाई गेदियां न जिंदी कुल लम्बाई 1 ज्हार 513 मीटर ऐ। अपनी इक सोशल मीडिया पोस्ट च नितिन गडकरी होरें आखेआ जे प्रधानमंत्री नरेन्द्र मोदी हुंदे दूरदर्शी नेतृत्व दे तैहत तैआर कीती गेदी इस सुधारत्मक परियोजना दी मदद कन्नै जम्मू कश्मीर दे सैलसफा सरबन्धी कारोबार च उछाल औग ते कन्नै इत्थूं दे आर्थिक विकास च बी बड़ी मदद थ्होग। जम्मू कश्मीर दा दर्ला दुनिया दे सैलसफा दे नक्शे पर होर प्रमुखता कन्नै उजागर होई सकोग। शुरू च इस बाईपास दियां दऊं लेन्स खोलियां जा करदियां न, जिसलै जे 15एं दिनें बाद जक्शन दे तैआर होई जाने दे बाद चार लेन्स इस्तेमाल लेई खोल्ली दित्तियां जांगन।

<><><><><><>

Railway Trail

उधमपुर-श्रीनगर-बारामुला रेलवे परियोजना दे कटरा कोला लेइयै बनिहाल तोड़ी दे हिस्से पर फाइनल इंस्पैक्शन कोला पैह्ले, कल इक होर कामयाब अजमैश कीती गई। परियोजना दे मुख् प्रशासनिक अधिकारी संदीप गुप्ता हुंदे अलावा उत्तर रेलवे दे बी केई अधिकारी गड्डी च सुआर होइयै ट्रायल रन च शामिल होए। रेल सुरक्षा सरबन्धी आयुक्त अत्तरूं 7 ते 8 जनवरी गी वैधानिक निरीक्षण ते अजमैश करगंन जेह्दे मगरा ओ इस बारे अपनी मुकदी रिपोर्ट जमा कराई देंगन, जेह्दे बाद सिद्दे कश्मीर घाटी तोड़ी रेल सेवा शुरू करने बारे फैसले गी लेइयै कोई एलान कीता जाई सकदा ऐ।

<><><><><><>

Jammu Rly Division(byte)

रेल मंत्रालय उत्तरी रेलवे जोन हेठ दे फिरोजपुर मंडल दा पुर्नगठन करदे होई “जम्मू रेल मंडल” दी इक बक्खरी डिवीजन बनाने जा करदा ऐ जेह्दी रस्मी तौरा पर घोशणा ते उद्घाटन प्रधानमंत्री नरेन्द्र मोदी हुंदे आस्सेआ कल कीते जाने दी मेद ऐं पैहले जम्मू रेलवे स्टेशन फिरोजपुर डिवीजन हेठ गै औंदा हा। एल्ले भारतीय रेल दे कुल 17 जोनें हेठ 68 रेलमंडल न, जिसलै जे जम्मू हुन 69मां रेलमंडल होग। आकाशवाणी दे जम्मू संवाददाता नै जानकारी दित्ती ऐ जे प्रधानमंत्री मोदी होर कल वीडियो कांफ्रेंसिंग राएं एह्दी रस्मी तौरा पर घोषणा ते उद्घाटन करगंन। इस सिलसिले च जम्मू च लगने आले समारोह च जम्मू कश्मीर दे उपराज्यपाल मनोज सिन्हा ते मुख्यमंत्री उमर अब्दुल्ला बी मजूद रौंहगन।

<><><><><><>

Kishtwar Road

किश्तवाड़ जिले दे पाड़डर इलाके च पेश आए दे शिड़क हादसे च 4 लोकें दी मौत होई गई ऐ। इस हादसे करी 2 लोक लापता बी होई गे न, जिंदे च गड्डी दा डरैवर ऐ। राहत ते बचाह् टीमें गी कम्में पर लाया गेआ ऐ। केन्द्री मंत्री डॉ. जितेन्द्र सिंह होरें इस हादसे पर दुचा ते बसोस जाहर कीता ऐ। उनें सौहगी परोआर प्रति अपनी हमदर्दी बी जाहर कीती ऐ।

<><><><><><>

CS-Khelo India Winter Games

मुख्य सचिव अटल डुल्लू होरें “खेलो इंडिया सयालू खेड्डें” जनेह् आयोजनें दा जम्मू कश्मीर दे सैलसफा गी कुलसंसारी सतह पर बढ़ावा देने लेई पूरा पूरा इस्तेमाल करने दी लरुरते पर जोर दित्ता ऐ। 22 कोला लेइयै 25 फरवरी 2025 तगर गुलमर्ग च आयोजित होने आली 5में खेलो इंडिया सयालू खेड्डें लेई सददी गेदी इक बैठका दी अध्यक्षता करदे होई डुल्लू होरें एह् गल्ल आक्खी। इनें खेड्डें च मुख्य भरै थमां कोई 1 ज्हार कोला बीमते एथलीट आवा करदे न, जेह्डे बर्फू पर खेड्डे जाने आलिएं केइं खेड गतिविधिएं च हिस्सा लैंगन। इस आयोजन लेई तैआरिएं जोरें-शोरें जारी न तां जे 2025 दे इस आयोजन गी शानदार यादगार बनाया जाई सकै। मुख्य सचिव होरें तैआरिएं कन्नै जुड़े दे सब्बने धड़ें गी आपु च नेड़मा तालमेल बनाइयै कम्म करने लेई आखेआ तां जे सुरक्षा, आओजाई, सेहत ते होरने सुविधाएं दी पक्की बवस्था जकीनी बनी सकै ते इनें खेड्डें गी पूरी चाल्ली बवस्था आले ढंगै सिर तोड़ चाढ़ेआ जाई सकै।

<><><><><><>

DC Kathua

जिले च बिजली सरिस्ते गी बेहतर करने दे मकसद कन्नै कडुआ दे डिप्टी कमीशनर डॉ. राकेश मिन्हास होरें बिजली दी मजूदा स्थिति दा जायजा लैता। उनें लोकें गी प्रधानमंत्री सूर्य घर योजना तैहत सौर ऊर्जा सरबन्धी सयंत्र लाने लेई गलाया। इस स्कीम राएं 60 फीसद दी रियायत लोकें गी दित्ते जा'रदी ऐ। उनें सयाले आली रूतै गी दिक्खदे होई लोड़चदे एहतियात अपनाने ते लोकें गी जागरूक करने लेई मुहिम चलाने आस्तै आखेआ। डॉ. मिन्हास होरें बिजन त्रोड़े दे बिजली दी सप्लाई जकीनी बनाने लेई नैहले थमां तैआर रौहने ते एहकमयाती उपाह् करने लेई गलाया।

<><><><><><>

Pak Blast

पाकिस्तान दे बलोचीस्तान इलाके च सुरक्षा कर्मिएं गी लेइयै जा'रदी गड़डी गी नशाना बनाइयै कीते गेदे आत्मघाती बम्ब धमाके च 8एं लोकें दी मौत होई गेई ऐ ते 40 थमां मते घायल होए न। पाकिस्तानी सेना नै हमले दी जांच आस्तै इलाके दी घेराबंदी करी लैती। अलागवादी समूह बलोच लिबरेशन आर्मी बीएलए दे मजीद ब्रिगेड गुट नै हमले दी जिम्मेदारी लैती ऐ। एह हमला बलोचीस्तान च बधदे संघर्ष गी दर्शादा ऐ जेहदे कन्नै पता लगदा ऐ जे अलागवादी गुट ते पाकिस्तान दे अधिकारिएं बश्कार तनाह् बधा'रदा ऐ।

<><><><><><>

Exam Postponed

कश्मीर यूनिवर्सिटी नै कल होने आले सारे मतेयानें गी अगड़ा पाई दित्ता ऐ। अधिसूचना मूलब कश्मीर यूनिवर्सिटी दे मतेयानें सरबन्धी मैह्कमे नै गुरू गोविंद सिंह जी हुंदे जन्म ध्याड़े दे सरबन्धे च आवा'रदी छुट्टी गी दिक्खदे होई एह फैसला लैता ऐ। अधिसूचना च आखेआ गेआ ऐ जे मतेयान दी तरीक बारे घोषणा मगरा कीती जाग।

<><><><><><>

Weather

जम्मू कश्मीर च ठंडू दा प्रकोप बरोबर जारी ऐ। पच्छमी हवाएं दे सक्रिय होने करी मौसम च बदलाव कल्लै तगर दिखेआ जाई सकदा ऐ। अजें तगर इंदे करी बरखा जां बर्फबारी नेई होई ऐ। दरम्याने दर्जे थमां भारीबर्फबारी दी मेद कीती जा'रदी ऐ। उआं जम्मू दे मैदानी

इलाकें च दरमेयाने दर्जे दी बरखा नेई सकदी ऐ। 7 जनवरी थमां 10 जनवरी बश्कार आम तौर पर मौसम खुश्क रौह्ग। 11 थमां 12 जनवरी गी हल्की बर्फबारी होई सकदी ऐ। 13 जनवरी मगरा परतियै खुश्क मौसम होई जाग।

<><><><><><>